

Despues di lunanan di preparacion Gerrit Rietveld Academie ta habri su porta na Aruba

MANERA ya anteriormente menciona, e prestigioso academia di arte -Gerrit Rietveld Academie- ta habri su porta na Aruba. Despues di lunanan di preparacion, trayectorio di inscripcion y admission, e curso preparatorio -Voorop- lo cuminsa riba prome di november binidero.

E academia lo den e edificio monumental caminda antes tabata Brenchi's. E edificio ta hopi espacioso y adecua pa un academia di arte, unda cu e studiantenan no ta haya les den e manera clasico cu nos ta custuma cu ne. E studiantenan lo haya den e edificio e espacio necesario pa por experimenta y crea productonan di arte. Tambe mester tene na cuenta cu entrante otro aña ta cuminsa tambe cu e estudio profesional superior, esta e HBO Arte Visual & Diseño cu tambe ta bay establece su mes den e edificio aki.

Pa loke ta trata e contenido di curiculo pa Voorop cu ta bay cuminsa na november, tin cu remarca cu ta bay bin cu experticio y conocimiento di Rietveld Amsterdam, cu tin mas cu 80 aña di experiencia. Pero un di aspectonan mas importante di e curso na Aruba ta, cu ta pone hopi enfasis riba e identidad local. Banda di e docentenan cu ta bin di Hulanda pa duna e parti practico, e

parti teorico lo wordo duna door di docente- y profesionalnan local. Importante ta pa pone e conocimiento adkiri den e situacion local. Den esaki lo tuma e experiencia di e estudiante, nos situacion y infraestructura local.

Aparte di e desaroyo personal di cada estudiante riba tereno di arte y diseño, e curiculo di Rietveld ta ofrece oportunidadnan unico, unda cu e conocimiento di estudiante riba diferente tereno por wordo aplica inmediatamente riba product- y situacionnan den comunidad. Por ehempel studiantenan di Rietveld Amsterdam, riba diferente momento di trayectorio di estudio, ta wordo acerca pa compania- y instancianan pa duna aporte pa desaroya y diseña productonan innovativo y infraestructura, variando di empake(package) di productonan pa haci e vivienda di cas di anciano mas comodo.

Durante e aña binidero e pueblo di Aruba na diferente momento lo por ta testigo di e resultadonan di e trayectorio di e studiantenan mirando cu cada ciclo di curso ta termina cu exposicion y presentacion pa publico en general. Di e forma aki Aruba por experiencia un tiki mas di kico tur Rietveld tin pa ofrece.

